

El pensier

Anton Maria Lamberti



XVIII secolo

Esportà da Wikisource el 10/19/18

EL PENSIER

Vado pensando, nonola,
Quelo che amor facesse
Quando ch'el te vedesse:
4No xelo un bel pensier?

Mi ghe scometarave
Ch'el restaria incantà;
E che dopo el dirave:
8Sta dona ghe xe qua?

Cussì el dirave, nonola,
E po dopo a bel belo
Quel mato de putelo
12Te vegnaria a basar
Prima la man, po un braccio,
E po el farla un sestin,
E po dopo el furbazzo
16A pian, a pian pianin,
L'andaria rampegandose
Più in su, più in suso ancora
Disendo: la inamora
20Custia l'istesso amor.

E nol staria più quieto,
Come i puteli fa,
El chiaparia un ochieto,
24La boca: e po chi sa?

E ti po disgustandote
Ti lo manazzaressi:
Putelo, ti diressi,
28Sta quieto, via sii bon.

E lu, come i putei,
Mezzo mortificà,
In quei to bei cavei
32Tuto quanto imbautà,

Parlandote, pianzendote,
Tanti sestì el faria,
Chie alfin te sentiria
36Dirghe: vien qua baron.

Alora, co quel sesto

Che pol aver colù,
Svolando presto presto
40Ora zozo, ora su,
L'andaria cocolandote:
E ti ti ridaressi,
E ti diventaressi
44Più bela assae de lu.
Ma mi deventio mato?
Amor l'à da vardar?
No xelo chi t'à fato?
48Questo xe zavariar.
Ah sì, son mato, nonola,
E pur tropo lo vedo:
Figurite, che credo
52Che ti me vogi ben.
E pur te pregaria,
Cara, benchè sia tal,
Lassarme in sta busia;
56Za no la te fa mal.

Informassion su sta edission eletrònega:

Sto libro eletrònego el vien da la version veneta de la biblioteca digitale [Wikisource](#)¹. Sta biblioteca digitale multilengue, fata da volontari, la ga l'obietivo di métar a disposission de tuti el pi gran nùmaro possibile de documenti publicà de qualsiasi tipo: romanzi, poesie, riviste, létere...

El nostro scopo xe de réndar disponibili i libri a gratis, a partir da testi libari da dritti d'autor o soto licensa libara. Podì doparar i nostri libri eletròneghi in maniera totalmente libera, per scopi commerciali o meno, a pato de respetar le clausole de la licensa [Creative Commons Attribution-ShareAlike 3.0 Unported](#)², o, a vostra sielta, quele de la licensa [GNU FDL](#)³.

Wikisource la serca senpre utenti novi che daga na man. Par quanto ghe stemo 'tenti, po' darsi che durante la trascrission del testo ne sia scapà qualche error. Podì segnalarli su [sta pagina qua](#)⁴.

Sto libro el xe sta fato col contributo de sti utenti qua:

- Candalua
- SPQRobin

-
1. [↑ http://vec.wikisource.org](http://vec.wikisource.org)
 2. [↑ http://www.creativecommons.org/licenses/by-sa/3.0/deed.it](http://www.creativecommons.org/licenses/by-sa/3.0/deed.it)
 3. [↑ http://www.gnu.org/copyleft/fdl.html](http://www.gnu.org/copyleft/fdl.html)
 4. [↑ http://vec.wikisource.org/wiki/Wikisource:Ciacole](http://vec.wikisource.org/wiki/Wikisource:Ciacole)